

法印品第二十

爾時玄臺玉宮中和真人為諸後學以七月七日大會崑崙玉輪之阿停留三月以十月七日大會崑崙金壇之上辰星之精夕炳神燭耀靈陽景分暉停照又經三月以正月七日上玄首元青天之氣流入萬象群有化生之初中和流變之始中和真人動用三元三會之初良辰吉日以朝上帝爾時中和真人法衆真位三萬六千上真俱乘正一中和法輪真精靈轄雲龍導騰蛇俠儀三界大魔飛空從車四部靈仙以擁飛蓋香官颺烟燭之反魂龍吟鳳歌和以天鈞神風微吹周流和雅香花愔蓋飄飄上昇是諸法衆神足蹈虛不勞運動譬如得雲霏輕妙須臾之頃上登玉清大慈天尊法門之前爾時上界諸真晨朝之時朝謁天尊又往玉清右雲宮中朝慶大悲真帝時遷於已十方上仙之衆集朝上帝大慈天尊時遷於中次有下仙天官上司簡度仙籙時遷於子次有水火下司注

記生死之簿天尊為諸衆生亦以三元之月十五日三司進朝後學朝慶但用三元之月月初七日晨夕願念悔過求願大悲二尊真帝是天地之祖宗萬化之元根也一切後學聖人無不祖於慈悲之道朝禮思念先當行慈以是義故十方世界天上地下凡聖所云大悲大悲正言二帝慈悲之道下世衆生但用其末希識其根三司之官四時八節不朝二尊則失慈悲之道不能含養萬物是故天覆地載一切萬物而不有辭上則三尊慈悲之道二尊之號施於下界凡俗之夫所言慈親象於此也一切衆生得慈悲之道故能子育群生雖不普得大道一心不如大道而能子育一切動植一切含氣若無慈悲則不自養安能養萬物是故上學之士先具慈悲則修學易成言必聞上凡夫有心可於密室修學上道道亦感之是以四部下仙道心不退吾見其志方便示導為昇玉清朝謁真帝我諸真衆當所神交恒與二尊以為親侍雖隔三萬六千天地亦猶凡夫同一室住不

以為遠何以故十方塵界同一道體以是義故十方世界未有一物一法能離道體一切有生皆是二尊之道氣也故我為諸下仙昇於上界朝慶二尊作禮問訊而請仙印教悟後學爾時中和真人與諸侍從稽首雲門拜伏良久焚香心念未兆所言復良久問如是良久討於下界已經九萬大劫仰觀雲宮之中虛白清曠寥亮皎潔唯有九色慶雲垂布圍遶光彩交暉無以為喻虛中真氣結成天經遍於道境文字分明諦觀易曉輕誦之者無由解悟是諸真仙心念大慈天尊欲陳心願而作是言願為後學之人斷諸疑結欲請天尊金口法印作是言已默住良久忽見大慈天尊雲龍座前百寶香爐烟氣自浮猶如神嶽蒸發大雲停動蕭蕭流他境天花飛空雲龍舞虛甘露微潤風塵不動驚和鳳吟音響相和合成靈章吟詠天經動經億劫而不休息聽者忘倦遺其雜想正心憶念皆得蒙益如是良久奮見天尊凝神出虛充氣法身遍滿空有真氣遊布無所不在不獨上界

而有天尊十方世界所在皆有森羅萬象無非法身爾時執蓋直事四部靈仙八萬四千人不在衆數見大慈天尊道力奇特一時驚歎皆言未曾有也是時中和真人與諸上仙先果六通然而無言並以神交沙界無所滯礙但以方便欲令下仙見聞上道昇入上界朝謁天尊為諸後學而請法印不自為師法應上聞大慈真帝爾時中和真人為諸後學上啓天尊而作是言下界塵臭煩惱多途沐浴玄思積經劫數常蒙法手携引愚迷流浪之徒未能盡善五情內爭六賊外馳後學之夫多懷異見不行大道迷墮邪津順入苦流生老病死為此因緣不忍聞見天尊答言善哉善哉善男子下世凡夫後學道淺何由能超生死苦流生老病死世間常事迷苦流者唯有道者能之諸俗法中雖有逆言而無逆體雖有逆理而無逆事理通事變非道所尚有言無體又非所尚理事俱通言體雙達我道能之淺俗浮偽因緣穢賤下土所尚如此之事不足致問爾時真人頓首受命於是八萬

四千直使執蓋小仙四部靈人未聞至道不辯深義誠在質疑爾時衆中有一小仙名曰寶相前進作禮上啓天尊而作是言臣等末學道淺不曉深義常聞下士凡庸書記傳說亦言我法能度生老病死出生死流身得六通智能無礙復見此人與凡不異生而老病終不免死不審此說虛實云何唯願天尊慈悲高鑒哀所不悟言畢叩頭伏聽哀旨爾時大慈天尊怒諸小仙以大慈故而語之言善男子汝等得道位階四部始入道流未免生死以汝等衆得承宿慶遇會天真延續性命若不爾者久以灰沉子所言者世俗經書之所傳說亦言我法能度生老病死出生死流復見其身隨世生滅此是入理之人作如此說事體不通但明空義辯能無礙非能理身而得無礙方寸之心與凡有異生者病死不能異俗間苦惱生死流轉入理之人身無道力不能逆之獨有大道而能超之無上道法能度生老病死逆諸苦流善男子用我法者理於生人能得長存轉凡成聖復歸於無胎合光氣

出有入無無所妨礙善男子善用我法理於末老其形及嬰歸於長生此名度老用我道法度於癡人及病者今其不病所苦得差此名度諸病人今其不病用我道法度諸死魂及諸罪魂今得離苦欲受生者今其如意不願生者今其無生此名度死善男子世法苦流以貪欲為本大道法中有除尸制魄修學此道即無欲想又苦流者以思愛煩惱衣食為累而我大道有八寶天衣自然之服隨其大小及與長短大道法中有太和生氣陰生靈符神水玉液以充飢渴却除老死煩惱疾病與世服用危固不同此名大道正法逆煩惱苦永斷生死諸浮俗法言能度生老病死逆世苦流譬如有人身嬰百病又復貧苦所求不得即出偽言誑惑下凡自言我是天人大師善療衆病辨諸方藥及以鍼灸愚人聞之齋持競往依止愚師受其方法所疾不愈而久彌癡一切貧病與師相似賢人觀之心知其謬捨置而去於是賢人擇師承受既遇明師實能愈疾門徒慈善怜諸貧病諸有

11052 A 010

病苦施為療治下手之時如湯沃雪是諸愚師及其門人各同愚人承受明師之法作如是言能依法苟得利益支持身命亦復何嫌二部之人明昧相反爾時愚師門徒子弟妒始明師日夜譏謗爾時明師晨夕進道行大慈悲不與彼諍善男子世俗之法譬彼愚夫所習邪道明師之法喻我大道真實之教能度老死逆諸煩惱順入道流天尊又言世俗之法不得六通智能無礙此亦偽言不可依信何以故世俗之人能修之而得六通與道相似等無優劣者即應能逆老死之流今既老病終於絕滅即名無智定無六通定無道力善男子以我法印印諸邪偽自當得知不修法印得知邪偽無有是處善男子世間有人直修空義無所為作自證其身與道無異如此之人止得高心嘖嘖之罪千生萬生終不得道何以故此人高心不願見道永與道隔長墮生死順入苦流道言若復有人求無上惠不見有生自言我本無生今有此身譬於夢幻而願滅度以求不生善男子如此

之人身染邪魅妄出狂言無所忌憚何以故欲求無生應修上道微妙之法以道法力逆於老死不順俗流然後昇入無形不生不滅非以滅生而能無生善男子無道之人不能留形以是驗之明無道力既無道力不能不生後學之子持吾法印印諸偽道其法自靈不假得其所修之法而得知之善男子若復有人學無生智而作是言我學無生不能留得即身而成妙道見身昇度但滅此身復歸於無自無有生若有衆生作如此說此名邪說非正說也何以故道非滅法滅身求道道存身滅修吾法印存生求道道存身存然後乃能虛身合道非謂滅生能合道也爾時天尊又告仙人曰道雖存而能虛身雖有而能無能虛能無乃名爲道善男子能存不能亡者非爲道也能亡不能存者亦非道也無上大道能存能亡得道之人亦復如是是諸外道能亡而不能存善男子汝今當知順向死易逆不死難善男子汝今當知順死之物名得道者一切死尸亦名得道若一切死尸不

名得道明知外道滅形非得道也此諸外道名爲入死之道非爲昇入無形長存之道善男子昇入無形謂修吾道印轉凡成聖練質入微不可毀壞猶如虛空而不變易善男子若有衆生任身生滅不能生堅固四大離散形骸盡壞欲望魂神證無上道猶如愚人披空尋跡終不可得以及吾法印印此愚人去道甚遠善男子若我法中師徒子弟以因緣之道而化衆生所謂建立清堂香燈供養方便惠利諸不達者仁及蠢動不害物命設齋請福悔諸過咎不應割其珍玩殺帛損敗衆生以活己身不應忘義捨大慈悲如此之人非我弟子是邪徒黨不損衆生不捨大悲真道弟子若我弟子以因緣之道化諸下根迷滯衆生著人我者耽嗜臭穢及以酒色蓄積無欺爲說無常身命危脆四大難保况諸外財方便教捨不損財命如此之人真我弟子若我法中門徒師弟教他施財及以玩好奴婢畜生屋宅田地私及已費不營功德此名道賊不斷癡貪不足化人教從後學下世凡夫

若見此賊慎莫親近道言下世惡人竊吾道要而術賣之以求財帛及規酒色如是過失亦名道賊非我弟子是謂外道邪神之黨同諸陰賊共作僞侶大道之士持吾法印若見此人應須速避勿同鄉里及以交言道言是諸邪師門徒子弟為貪利故勸化凡夫修因之道今其布施取其穀布入己私費自說其身名世大師能為眾生長福生善能施我者獲福無量後世之人學真之士修吾法印印此愚夫名為邪賊諸布施者莫施此人忤其後生墮三惡道諸惠施者成此之善莫成彼惡以是因緣不當惠施學道之士執吾法印慎莫如彼邪俗之法道言往昔劫中有一邪師字曰求名身懶衣食詐稱得道隱於寒林常自唱言我已證道善知法相視地而行入村教化積經三年林外人民競往惠施財食盈溢因此財私給妻子及市魚肉屏處噉之詐言齋食前後八年天司殺之謫其魂魄八百年中墮涸坑地獄已後出生寒林之下受形羊胎一歲三生備償施主足五百生後受

牛胎備償人力使復五百生今為僕隸猶未解脫雖生長壽百歲不死筋力又羸駘策不逮常為世人之所惡賤八年欺詐自稱得道窮劫受辜况人終身常行噴噓自稱人師惡求名利損害一切眾生財命億劫受罪猶未解脫望入無生安得有冀後世男女執吾寶印慎莫欺詐受人惠施爾時諸仙雖奉天尊金口法印心尚朦朧未能辨了合眾作禮重啓天尊向蒙慈尊金口法印云用法者能度生老病死不審慈尊以何妙法濟度眾生而得不生不老不病不死以蒙垂慈願見生老病死之苦與世邪俗不能有異唯願慈尊重為分別言畢叩頭悲哽流淚伏地不起希降玄恩爾時天尊告靈人曰善男子此道至妙其法極神教諸成真不授俗流諸下仙輩汝等見我去真不遠墜子有心故我不秘汝當諦聽吾為汝說須臾之頃大慈天尊即命左右侍者三十九真齋鼓太虛大慈宮中自然生根復虛理魂妙唱和合三十九章金鳳之歌以調三十九氣吟其篇目一時之

頃其時琳碧袖條瓊枝吐葩調畢成實萬化歸根三十九真變為虛光金鳳易形以成妙氣光氣交映猶如春蕊須臾之頃變成仙雲入於宮中凝斂梁棟冥然不動大慈宮中生根復虛理魂妙唱其詞曰
慈宮洞真暉昭晰掩朝陽六合開門戶太空明騰靈雲悵羅輕蓋九氣變飛龍一舉神足遊飄然無有蹤道名大慈尊神力無等雙天經列眾象吟嘯和心會
爾時天尊眉毫神彩光踰初日洞暉道境幽冥開曉十方世界皆於光中朗然而見爾時寶相及諸來眾觀此真光心眼明了盡見十方世界一切色像皎然無礙須臾之頃大慈天尊遍滿光中處處說法一切色像亦皆能言助說天經善聽之者成賢成聖用吾妙道超離若流服吾妙氣立便無待死魂得之則能受生生人得之則能無病老人得之則能反嬰病人得之登即痊除道人得之歸根復源俗人得之所願通達愚人得之永離盲道上天得之三景貞明大地得之永不崩論萬

033 A.110.2

物得之能終其生啗得之而即能言跋疐得之立便飛行

天尊告諸靈人曰吾此法印是諸後學存生全形無生之道一切衆生失吾此道悉皆殘形滅生順流入死既無道力不能無生不能無死後世男女學真之士持吾法印深思此道是諸後學之根本也若有衆生離吾大道微妙之法能得全形無生之道終無是廢失吾生道如鳥失翼亦猶濟人亡其船筏遙想彼岸無由得度一切萬物亡吾道氣終不得生一切衆生言離大道而能得道猶如草木遠離地水定不虛生一切衆生遠離吾道定不得道善男子事可類推昭然易見物不類用愚人不知可類用者人亦不知得俗之夫雖知類用與不類用亦不能至當用之得當即能全生用不得當自用殘形得失相反生死相背昇沉邪正生死之際自然而辨無手一遠則生二見能復歸者萬無一人以是因緣得道者少失道者多真正者少邪行者多大慈天尊曰汝諸衆等但誦大慈官中至

真妙唱採服靈驗即能善出生死之流即能救脫生老病死之苦天尊又言此微詞非是虛言要在服用言行俱行靈驗在即誦言無數所不觸老死行而不言可以絕塵子能絕塵與道為隣與道為隣物不能怨物不能怨是名歸根無形可繼全生入無謂之無生善男子形不全者不能無生不全者名為入死夫入死者名無道力若無道力不能無生而入死不如草木及以虫蟻朝生暮死人出一生自言學道唯學空行噴噓之法不免生死何以故空行之法上聖能之在學凡夫觸事有礙不理生具不攝形神生不能固形神流散空生空死不能得道後學聖人初在學地攝生理具晨夕不懈得道之後即能空虛非謂在學而行空法善男子下世流俗邪偽之黨傍聞大道微妙法中存形存生能入無生邪俗之夫便謂殺身之後精靈罪鬼而能無生此等邪俗行空之法自謂其心能行無礙力能反覆天地迴易陰陽和合水火不見天地萬物生死妨礙作此見者名為得道欺誑世俗

要求聲利不敬父母或言無生妄想而有有死之時自言無死况有煩惱飢寒疾病如是諸見皆是妄想邪俗之夫作此見時名為得道若我法中初學之人作如此見名無忘諱反逆大道道不玄祐身無道力暗生暗死一切事數皆不能免况能證道冥司之官猶注黑簿以其噴噓自誑誑他如此之夫悞無數人永失生道如此之夫空有大言不行大道亦猶疾人言善治病亦猶跛人賣能行藥乍而聽之一往如實智者觀察即知其謬。爾時實相合衆再拜叩頭而作是言向蒙慈尊言這妙氣服者無待願請其方以輔形命終身奉行不敢輕泄天尊告曰無上至法授與能行子既有心吾道不秘汝當諦聽至神之道無能先之實相合衆伏地諦心領受天尊告曰道氣之妙其法至神天地萬象元氣所生未有一物不由元氣而得自在昇沉飛走乘氣而遊得氣則存失氣則亡存者不可得死亡者不可得生氣有清濁事有否泰

服清氣者活人御濁氣者殺人清氣上浮濁氣下沉清氣為天濁氣為地真精妙氣謂清氣也凝蹟穢滯謂濁氣也死道昏濁如濁水也生道澄徹如清水也人猶魚也氣猶水也水濁則魚瘦氣昏則人疾善男子下世衆生志多勃逆煩惱奔躁求諸可欲情性喜怒狼悞憤烈皆死氣也仁慈孝順安序徐審和悅中雅皆生氣也忘身冥道不覺衆累萬化不過目千響不經耳所動如無所止如虛恒存清氣流入雙關散道經緯遍體雲行天關微呼出一半氣心念半氣循環雙關令不馳散朝餐紫華夕味黃蘗如此之法是服日晨氣用我晨氣保見太平取飽為度無正限也於是經緯流通百關調柔色美髮黑氣力倍常存身全生莫先此道此道是後聖之尸牖學真之樞機是一切萬有之生根也流布凝結成天成地成日成月成星成辰風氣雲雨霜雪山川土石草木水火賢愚凡聖人及非人皆是一氣變動乘諸得生如吾道者為賢人用吾道者為聖人不用此道者名為行尸形

骸流散魂神罪鬼沉沒九泉矣爾時天尊說此法已金口應時流出三萬六千真光妙氣衆籟齊吟天樂流遍有情無情悉皆自鼓是諸下仙得真道氣同謝受生歡喜悅豫不可思議奉行妙道皆得全身入無生道成道已後固修不廢道言諸學道之子得道力者凡夫不知但觀其形雖不肥腠色正力強身體輕妙皮容潤澤聽察不掩行步輕便晨夕不睡身無痲癢形貌鮮潔聲響清潤如此之人名得道力進修不退定得免脫生老病死善男子持吾法印印此上士立驗在即不待得之然後始知大慈天尊重告仙人曰汝欲知偽道之夫道觀其形世若有人自言得道深明道義或言我今日夜修道身心不迫或得三十四年間邪正可辨得失易知善男子汝知邪道之夫第一血食第二耽淫第三惡疾氣腫瘡疥癩癩癩習邪失性水腹癥瘕顏色焦乾耳鼻枯燥處處疼痛氣喘液竭無有津潤貪睡履汚不忘生死形容垢膩體氣臭處所向便利

好講惡事馳競奔躁積聚無厭肉大骨小瞻視淺近性無仁慈心不孝順此等色人定不得道此名有漏之身亦名敗壞之身假有道氣不能自度况能度他猶不自活何能活人善男子偽道之夫作法之時男女交雜開閉門戶施惠財食還與外道不忍普惠此名有漏作法有漏惠施非是正法非是法施無上大道仁及大地布散元氣長養萬物顯仁慈用不恃其功不見所施不見所受况覓其報外道之法不斷癡貪此名有漏定不得道若我弟子作此惠施同彼妖邪我弟子後學之士持吾法印若見此人勿與同行非法居住應須擯挫以法教語如不從者自天罪之不得奪命及以鎚打刑殺罪天科不赦天尊曰後學之子修吾大道初在學地未證果前慈悲忍辱恩流蠢動孝及一切單衣菲食蔬素芳潔燒香禮願晨夕懇懇精容其行相慎凶惡不馳不競宴處虛寂吟詠寶經微聲平氣身心調柔忌諸雜想專心念道如有所持餐服妙氣吐故納新如諸靈芝神符聖

水幽身避世不交人事如此修學未踰一年神靈給使衆毒不害舊疾銷除顏貌反嬰氣力丁壯自求多福身心無厭我印此人克成真道

大慈天尊又告寶相曰下世愚夫不修大道無上至法而作是言應滅此身冀得清虛會真宗者喻如下世崑崙山陽往昔之時有一戎夫名曰憂波斯那立性兇頑多畜妻子其第三妻貌甚鄙累生子子戎夫自計心陋此妻又懷娠於是戎夫但念其子不暇待產○醜殺其母既命終剖腹出子子猶未成始疑胚混隨母爛壞不可捉持戎夫自惡後方悔恨而作是言我妻身體不能如騾懷妊之時剖腹取子傍觀之者而告之言長者當知騾懷妊時候其日滿知母欲產剖腹出子乃全子命如長者妻異於騾身况復懷孕始經三月假使月滿亦不殺母剖腹取子何如養母而育其子子得長成毋自老死何用殺之而欲此兒紹隆家業猶剪樹根望菓成實終不可得善男子邪俗行尸亦復如是不修至

理求欲滅身而望罪免得會真宗如彼戎夫殺妻取子一何執滯哀哉流俗浮偽若此安可與其聞大道乎執吾法印不應如彼善男子修因之道尚須善願願得見在未來見道聞法况求即身而覓解脫善男子法學大道

存形存生無生之道喻如舟車堅固輕利縫緞綿密陸行堪載濟能勝溺保達所在永不勞慮豈不樂哉善男子世有愚人聞他得度傍而學之身無智力性有疎懶不能擊畫捨他破壞所棄舟車運危濟溺未至中道傾覆○敗亡摧折淪沒不可思議善男子等汝今當知敗車破船不能自勝何能度人邪俗之法亦復如是不能自濟何能濟他下界凡夫憑向外道邪俗之法拔濟存亡亦猶愚夫運敗舟車摧沒之禍立便可待善男子世若有人乘破船筏得濟渡者外道之法應得無生若以破船不得濟者外道之法不能無生善男子後世男女欲學道者採用天經吟詠寶文此文在天為經在地為緯南北為經東西為緯在中為神在物為氣在人為靈故曰天經

地緯織成凡聖一切萬物有形無形無非大道真氣織成也諸仙人曰敢問慈尊織成之方天尊答曰天無言而有信故可軌之成仁三景不言而明故可則之成身地不言而有義故可範之養物道無言而有靈故能生天

地天地萬象亦經緯也織凡成聖仙人曰敢問天地萬象非道之體云何織凡成聖答曰道生元氣元氣生太極太極生天地天地生萬物是故天地萬象皆道之子孫也何為不能織凡成聖大道經緯羅列天地所布日月星辰風雲雨露金玉土石草木雜類皆可採用以輔學人甚疾成聖既得聖道能制御天地及以萬物爾時有一下仙名曰證明聞天尊所說迷惑不悟重敢致問而作是言不審慈尊金口法印所云學道之士採用日月星辰風雲雨露金玉土石草木雜類以輔學人甚疾成聖既得成聖選能制御天地及以萬物弟子蒙昧不明妙理祇言用天之道德芳於天惟願慈尊賜垂分別

天尊答曰學道之士用天之道及以萬象甚疾成聖者無上大道真精妙氣隱在天地及以萬物善用天道及以萬物大道感之譬如孝子似養父母心無拒逆四時溫清瞻視顏色設復遠行心中憂念存憶父母如對目前寤寐之間精神不離自天祐之鬼神護之孝至二親尚能感天孝至於天理應感道

爾時燈明并諸後學聞天尊所說心開意解信知天地萬物皆於學人深有利益明知天地萬物無非是道歎凡夫之徒不能用之如我未悟亦復如是合衆禮謝天尊受生之恩爾時大慈天尊又語仙人曰天地之德德具於道其中萬物德不盡備但取一用和合利益功德道同知用天地及以萬物以輔身者無煩三清秘文三洞真法三洞秘文道高法妙難可叨佩及以見聞學道之士求真不懈功滿行成我道自來度於子也是諸仙人深明道義洞曉存形無生之道進仙三階登不死地盡能昇入無形始驗無生非滅生也燈明中和真人為諸仙人請法印已一時辭別

天尊七日七夜徘徊雲間
天尊又曰得道之子遐觀洞聽身心自在微妙快樂解脫無礙我今與子雖隔三萬六千天地猶如指掌近在目前有何可別不如下界塵俗行尸對面胡越汝歸下界勸化衆生令遠邪道漸頓之法量物所宜是時仙人稽首再拜奉行法印昇入無形大慈天尊分形諸仙流布道化

爾時諸仙歸下界已止往空中去地萬仞坐於慶雲之上是時天柱四方大地震動龍神歡喜天地朗然烟收霧卷三景倍明香風馥暢甘露滂流地涌乳泉川澤平濟祥瑞鳳紛絃雜集神芝嘉卉連塵接野是諸天王咸謂國慶皆稱萬歲大赦天下出庫赦帛於恤老病善天作樂頌賜爵祿天子諸王群公卿士不可勝記登壇朝禮大謝恩造巨施珍寶立靜供養普天奉道妖邪絕蹤萬國太平普天齊濟人民豐樂謠歌頌頌九萬年中天無雜色獨有紫雲潤不別流唯洒甘露下界小仙覩道慈方知是大慈天尊威神之力是時

仙人各陳心願遂禮太空之中

爾時大慈天尊與諸上真及諸上仙各授手遍滿下界為說妙法授諸下仙上道一階各令下仙進修至法入於全形無生之道大度衆生入真妙法登不退果不可計數胡夷蠻獠及諸鬼神地獄罪魂等衆悉沾玄化皆得利益從此已後人漸澆競多事凶害大道不行妖魅萌生雖不受度道猶殺手施大慈法後世男女既無正心試行吾道道亦與之不責於人亦有因與漸進亦有中道而退吾見其退亦不執之道雖無心常慈養物大道如水止涓除穢道猶良藥動而服用定能愈疾有病不服稀能自愈後世男女勤修吾道定免死厄全身保生能入無形與道為儔背吾道者不除死藉不免死厄形如灰土魂識漂浪隨業受報生無道力死望道生終不可得從今已後陰氣漸盛人不畏死修學外法不得大道如此之夫多被妖邪執其魂魄身遭疾病無方療治命滅之後隨邪群黨定不得道雖有小善無由報應由其失正不願行

道邪鬼侵之如此之人雖言萬物皆空我身亦空物境既空何有能侵我身亦空有何所受妄想受畢竟空寂都未有惡人偏見作此觀時邪精魅物競來侵害無所畏忌亦有生身遭鬼隨逐邪神一絕而去此名全身入邪不須待死取其魂魄若有女人身身懷邪顏色萎黃處處疼痛常吐涎沫或復洪腫水土惡氣百節酸痛風症入心恍惚迷忘救氣不暇安竟道手痛傷流俗自取滅亡身各有道不知用之與道為隣不肯析之徒近玄流無心洒垢神醫在側不知愈疾甘心受苦嬰抱楚痛如此之夫去道不遠邪惑其心障覆其目順流而去不能逆來

大慈天尊為一切衆生演說法印流通供養精至之士寶而行之邪俗之夫誹謗四起善男子汝今當知信敬我道亦不益我誹謗我道亦不損我善男子邪俗之夫如獵犬食無有定主譬如東家修善長齋持戒不熟西家十惡專事屠販漁獵殺害家豐薰臭所食之餘棄之域東家大子承臭而往食其殘餘

遂至忘返於是西家先復無犬大小見之歡喜餘食倍與薰臭爾時犬主性器弘大亦不呼歸歲月經久犬遂長大不識前主主忽出遊暫過西隣犬便驚吠前主慈悲亦不致怪却後數日十惡之家忽被天殃合家滅命先人收養臭爛之餘亦以窮盡犬既飢餓終日號鳴舊主聞之合家議言犬子少小愛往彼家所食臭爛穢性以成卒不能改設呼暫還終歸不活須臾之頃犬便餓死主又歎言犬子向在我家常得聞法縱不悟解亦潤其神

糞犬後身得生人道無故往彼十惡之家飲血吞膏食噉臭爛今忽餓死無一善緣此犬必定不生人道善男子我喻惡人邪俗嫉妬忘失根本誹謗大道與犬無異為逐臭爛故不識前主學道之士含垢懷辱忍受誹謗彌加精進求無上道復應却照邪俗之夫不離生老病死之苦不能超出纏累泥滓淪沒邪道癡貪三毒以成其身十惡五逆是其徒黨財色窟宅是其居處惡口惡舌是其歌頌誹謗如始是其心行邪俗之夫不見真經不聞真

說無以止惡禍患如此後學之士應離此人

不須訓對與其諍論自求昇度晨夕不懈邪俗之夫法有興廢身有老死未死之前已被災害是其邪法不驗之徵學正道者身無疵癘是其元吉全生之徵應自慶幸深避惡害

執吾法印勿受邪言善男子劫初之時有建木鄉人入於山南街賣真珠時有山東商人姓頗羅隨名曰滿願出庫百金買得一珠圓明曜掌大徑一寸囊肘自隨不令他見數旬之間忽有山南一人名曰雷詰偽賣魚目滿願西隣壽量之家亦出百金買得魚目亦以懷藏不令他見却後六年二家惡疾祈得明師來療此病和合藥分須好真珠爾時二人各出真珠以闡明師師遙見之懸知後人買得魚目師即語言此非真珠壽量狐疑恐師行誑請師水之浸經一宿合器腥臭真珠入水彌益光明九日出之引長六寸滿願服之所苦立愈後又市珠請師教浸水服之丁壯于今已壽九萬餘歲上皇玉簡題不死名一切善神適為給使此人又復得吾真氣之道

亦能御氣而遊無復死厄西隣合家因此惡疾以至滅絕唯有一奴名曰勤子少小有心常仰天歎願得天道救其所苦我命上仙大通教其餐松并服松子于今不衰入於太白時遊天上登崑崙吾以授其晨氣之方必定免死而得真道善男子真偽之道生死相背不可倫足執吾法印能辨邪正修學之士望濟一身傍度幽顯不可造次以規聲利忘其大成至真法中幹用之士道迴天地德拒四時不為晝夜改易乾坤崩淪道能成之天地毀缺道能補之生氣不足道能足之萬物不養道能育之天下不化道能化之一切凶惡道能變之一切為善道能福之愚暗之者道與其先孤遊恐畏道來友之飢寒病惱道為除之履涉危難道來安之白刃臨項道能救之善男子汝欲學生莫於無上大道至真法中生不正行諸所施為盡皆中正大道玄祐不畏邪道無正根力無的依憑譬如迷人進退失路不知要道始年昏惑所習不定或言忘心不見有身心既無生聽可得忘即心有

累云何忘之始欲此身復歸四大身雖暫忘四大猶在假使體空不能無觀一物一觀已成二事前境未忘後觀續生一切因緣以四大而起身由四大和合而生絕滅之時還歸四大外道之夫猶如草木因四大生因四大滅不能不生不能不滅欲其即生亦不能得欲其不生亦不能得外道亦爾於生死中不能自在為物所負隨境生滅善男子得道之士能忘身心不見所能不見所忘境智體空觀無所起我所受形從道得生今忘此形復歸於道不為四大之所攝持不為四時之所生滅不為累患之所繫縛所謂無上大道能存能亡能無形存能長生寂寥幽真恍惚希微不可以智知不可以心識應物有周動用無極善男子無上大道慈悲之力不可思議後世男女持吾法印深心思念當正億持爾時天尊說此經已五百外道柯葉惟等悉捨邪法肉袒求哀從道出家欲求濟度悔過自責遍體血流拔除鬚髮如鳥鐵翮躡身自撰猶如山崩爾時天尊即命中和真人開

度外道殺其往生因緣之道敬觀無常戒莫戕害斷其寢食不令蓄積中和真人曰汝諸外道從今日後慎莫自高詐稱汝是天人大師損他財命天司黑簿注汝罪名九祖受考身為逆鬼汝今生存單衣菲食以支身命忍辱精進求早化滅後生中國見道闢法即身穢滯不堪全形入無生道是時五百外道歡喜禮謝中和真人辭別天尊各還其居遠立精舍晨夕行道觀身無常求早滅度四天之下人及非人咸悉歸依正真之道是時天尊與諸聖眾真應之身遍於法界於是靈仙之眾八萬四千執持法印作禮奉行

太上大道玉清經卷之十

027 48103